

公私聞見錄

一

共四

卷之五

東平公聞見錄卷之一

世宗朝有一少姬寵冠後宮常在左右姬恃

上眷愛以微事上請 世宗下教曰使兒女子敢發
干請之言由予啓寵而然也此女幼而如此壯可知
矣乃斥而遠之終不復近云余八代祖直學公仕
世宗朝此說流傳於家庭故余得聞之

○成宗大王鍾愛一王女常以倭真珠耳璫賜之宮
中傳玩稱為無價寶子孫世傳尚今留存余嘗借觀
之萬不及於今世之所寶者近世尚侈此亦可見矣
○仁宗在東宮開書筵講官開卷進讀忽有色慘沮

徐令_下宮口讀止起而八內少頃復出曰有_典八袖
螯之甚急纔已去之耳 仁宗方冲齡而聖德天成
雍容如此余少於家庭得聞之 順懷世子嬪尹氏
之卒也殯於昌慶宮之通明殿將附葬於世子已卜
日而值壬辰倭亂 車駕蒼黃去邠遂掘坎權厝於
後苑及翌年還都則已掘去之矣竟不得其所在其
坎至今凹陷尚不填平余嘗目見而聞於老鑑其言
如是云順懷 明廟世子也

○宣祖崇尚儉德御衣無錦段尚設不貳載嘗迎詔
西郊內行進午膳及撤命招諸儀賓賜之所設只水

澆飯一器朝魚六七斤及醋薑淹菜醬而已諸公食訖上命褰餘袖去曰此禮也先君翼憲公聞於海嵩尉尹公新之云尹公即宣廟主婿謚文穆

○宣廟時八侍臺臣有以近來服飾華美為言者宣廟披裡衣示羣臣曰余衣亦用綿布臣子服用豈有過於余者耶諸臣惶愧而退自後侈習一變聖人化俗之機在俄頃者信矣余曾祖左相府君親承上教每言於家庭云宣廟所御綿布衣尚在其時王子後孫家人多有見之者

○宣廟朝以璫李鳳庭嘗玃侍龍光供俸等見問頗

得宸翰徐云李東臯浚慶時為首相牌召鳳庭責之
曰汝以內侍模習御筆將欲何為乎不改當有重刑
鳳庭大懼效松雪體以變之 宣廟聞而喜焉余嘗
聞此語於先輩而未得其詳及見仁興君所撰月窓
夜語亦載此語仁興即 宣廟朝王子也其言宜可
信

○海崇尉尹公常言 宣廟常謂諸公子曰爾輩謂
予樂於為君乎一人不得其所皆予之憂也豈如爾
輩出八自恣無所係着者耶使吾受河城君祿奉以
供朝夕而心無所憂則必勝於南面之樂矣此則黃

也 上

以禮倖為媚附

中人而

黜之累方下

六由於待宦之厚

薄後有廷臣以此陳白者

上始覺其誣罔悉以中

官變亂黑白狀諭之羣下莫不感歎

○萬曆壬辰唐將征倭時至義州謂我人曰汝國禮樂文物動遵中華而軍民皆無樂生之心者皆骨軟禮苛之致蓋唐將審知我國風氣柔弱人心脆薄而徒以浮文小節為務故民不堪命而至於此耳旬月之間乃能察人國事如此

○萬曆丁酉唐將之再舉征倭者皆到漢京

上命分館于士夫家客至宗宗家會賢坊第亦有來
住者而所管軍卒接于傍近人家中有一卒以屠牛
販利一日宰屠纔畢大將之在義州者傳令禁屠殺
其卒不敢以令前為解即掘土埋之其令行禁止如
此

○宣廟朝國舅延興府院君金公悌男即余所後外
祖南公之表叔也國舅第老婢子逮事者嘗言永昌
大君之生人莫不相賀稱慶而獨延興公子清州牧
使球之配鄭氏憂歎不已其后永昌枉死而金門幾
滅蓋預料其為禍兆也其婢語此事咽不成聲

○壬辰之亂 宣祖去邠至松都百姓全集迎 駕
或痛哭或垂涕而其中木疆無識之類高聲呼之曰
主上不念民事專以富厚後宮為事以眷愛金公諒
為第一策今日到此何不令公諒却賊耶至有向上
投石者而侍衛單弱不能禁其時掖庭隸之隨駕者
言於余以 宣廟明德豈偏厚於公諒而公諒之深
怨於一時可知公諒仁嬪之兄也

○貞淑翁主 宣祖大王女也嫵其庭除狹隘告之
於 上曰隣家逼側語音相聞簷宇淺露無所礙隔
願得價而置其地 宣廟下教曰聲低則不聞簷隔

則不見庭何必廣乎人之居處容膝足矣因下簾簾
二浮曰懸此以蔽之可也翁主遂不敢加拈及 仁
祖改王後始以私財買以益之云翁主東陽尉申公
翊聖之內也 宣廟將擇儲試問於諸王子曰饌品
之中何物為上光海對曰鹽也 上問其故光海曰
調和百味非鹽則不成矣 上又問汝輩所不足者
何事光海曰只以母之早死為痛耳 上奇其對光
海之得承儲位專賴此言云宋叅奉德基嘗聞於許
筠如是

○宣祖大王至誠事大允於表咨文字必親加考閱

未嘗泛過而槐院諸臣不能仰體 聖意不自製進
專委之於製述官許激激庶孽也識見多不逮其所
結撰或不能稱旨 上累下嚴教至曰公卿置國事
於相忘之地而唯一許激擔當勤勞哀哉仍命賜許
激某物蓋以激責羣臣也余得聞於家庭

○世之欲以一已恩讐求以禍福人者皆不知命者
也當 宣祖中年金公諒者以仁嬪之兄荐被內眷
人多輻湊而有一朝官尤親昵時具綾海窰心惡其
為人也言於稠中曰我入臺閣必駁此人朝官怨具
公次骨使公諒為中傷計 宣祖慮具公或為他日

仁嬪子孫之害時 元宗在定原邸遂以具公妹配

元宗是為 仁獻王后後 仁祖改王具公子弟

以勲戚累代隆赫富厚近百年而猶未艾究其所由
則皆出於朝官中傷之詐禍福之來果可以人力為
之乎世之欲求福者與欲禍人者視此則可以知事
皆在天而人不可以容力也有耆老宰相為余言之
如是

○安公垣大家世甚寒微而性淳謹不與人較有女
八宮為 中宗大王後宮是為昌嬪自是持身愈益
謙謹雖隣里小兒到門詰責只引過遜謝而已一未

嘗發忿悻之辭及嬪生王子女遂杜門不出恐人或
以王子外祖家稱之昌嬪次子德興大院君寔生我
宣祖大王八承大統安公處地尤尊貴而不變賤
時之心身不着細段晚以老病失明 宣廟欲榮其
身擬以尚方所進貂裘賜之而恐違雅志使人試之
曰 主上方製貂裘必以賜公既賜之後則公不敢
不着矣安公曰我是賤人着貂裘死罪違 上命亦
死罪等死無寧安分而死 上知其意不可奪命家
人稱為兕狗皮以進之安公以手摩之曰尚方之狗
有別種耶毛之柔細何至此也為加於身 宣廟之

於安公乃外曾孫而不過厚其衣食安其寢處而已
未嘗加一命之官蓋未敢官私人安公所得迪順副
尉告身亦其原從勲例得之无私恩也至孝宗朝
追贈右議政號余幼時有老宗室言之如是

○金文忠公尚容在宣廟朝陳于榻前曰士大
夫書札之行吏兵曹者已是可駭事而近日則婦女
謔札公行於兩銓至有由此得官者此習不止終必
為亡國之兆也至光海朝其言果驗

○萬曆壬寅宣廟簡定繼妃大禮之日諸後宮多
有不平之色獨仁嬪金氏辭氣安然至奉進龍袍之

際供奉左右有若別有喜事者然當日宮人之侍殿上者皆曰金嬪必享厚福之人先君幼時聞於廢朝國舅夫人言于家庭夫人即余曾祖之姨氏也

○宣祖大王嘗與征倭天將泛舟漢江天將曰此有潛龍軍校中有捕之者請觀之宣廟曰龍不為害何捕之天將笑而止蓋中國人多善幻術者故慮或被其誑眩且慮所捕雖真虜之亦難也時余先祖扈駕親見其事故余得聞家庭

○宣廟朝王子於國舅潘城朴公在世時皆幼冲無相接之事及延興金公為國舅諸王子皆長成矣王

子逢着國舅於路上則下馬拱手而立國舅亦下馬
於王子乘馬而王子乘遠遠步行然後始乃騎馬而
去歲時必候謁國舅而下馬於大門之外王子之尊
敬國舅如此而國舅夫人見王子盛備饌羞以待之
國舅家之禮待王子亦如是云余外祖南公即延興
公之甥侄也親見其事傳於後云

○宣祖朝搢紳間有飛語謂鄭松江澈嘗有豈無一
日之說蓋欲松江有欲山陵速崩之意也終至流入
大內 上下手札問于我曾祖左相府君曰鄭澈一
日之說卿亦聞之乎虛實何如府君曰流播之言無

人不聞臣何敢曰獨不聞乎但搢紳間喜傳此說者
皆平生不悅於澈之人也是以臣則不為之信聽矣
○光海時老宮人言年豐光海之讐也余詰之宮人
曰光海即位後歲數登稔百物豐饒近習專尚豪侈
心漸加士夫貧侈尤甚 明宗朝老宮人尚在闕中
歎曰豐年宜在聖世而反在今日無乃益吾君豫大
之心而使之失國耶由此言之則豐年豈非光海之
讐耶

○廢主光海妃柳氏崇信佛道輦致金佛於大內親
事禱奉以求利益且於宮中刻木範土造佛像甚多

以賜內外寺刹常祝天曰願後世更勿為王家婦云
伊時余先君得聞國舅家人之言後言於家庭

○余兒時入禁中聞諸老宮人萬曆戊戌光海主在
東宮嬪柳氏以臘月四日生子在日朝有荷生于
禁庭窪池中俄而長俄而華俄而旋落蓋一日間耳
宮中皆以為異瑞及光海嗣位在封為世子癸亥光
海遜于江華在亦廢放江華於荇棘中闕地跳出遂
不得令終其荷先兆其不久歟方其臨死嚔唏嘆咄
口占一絕曰塵寰翻覆似狂瀾何必憂愁意自閑二
十六年成一夢好隨歸去白雲間吟訖又仰天長嘯

者良久遂死蓋其得年二十六也

○余內公主之保母尚宮金氏即光海朝宮人承恩者也為余言廢朝官邪事且自言其遠族有末擬扞城郡守者因渠受黥故渠得賂甚多又聞老武李璟之言其堂叔某者當壬戌秋得擬雲山郡守末望而其時三望皆有內請光海難於取舍數月不下批某乃賣數三臧獲厚賂寵姬金可屎竟得差徃及仁祖改玉革職廢痼云金氏良家女子也今上乙卯老死于余家年八十一

○光海乙卯為其妃柳氏之慈堂蓬原夫人鄭氏錫

宴瑞慈臺廢東宮贈詩曰邀齡八袞慶綿綿玉樹芝
蘭滿眼前宸眷深嘉垂百歲孝思常願奉千年樽開
紅醞天香襲珍賜瑞臺雨露偏上苑新秋晴日永渚
蓮沙鳥五雲邊鄭氏次韻曰繼繼承承寶曆綿文慈
武孝兩無前光騰門戶逢千載德配乾坤祝萬年未
死重遊蓬島上餘生深荷聖恩偏陽春一曲誰能和
小海奎章映日邊後題萬曆乙卯孟秋念五日蓬原
府夫人臣鄭氏敬次主上殿下賜宴瑞慈臺春宮
府韻廢妃又為鄭氏張壽宴于通明殿光海贈詩曰
鍾德名門壽福全宜家令範更無前森森簪笏華軒

益濟濟芝蘭錦幌連慶建少陽鞏國祚光昭 理廸
民賢坤宮奉酌通明殿盛事人間萬口傳鄭氏次韻
曰未死殘骸幸尾全御風重近紫宸前日邊佳氣衣
邊襲天上恩光席上連霞醞宣來欣醉飽少陽昇坐
賀仁賢賡歌寶什翔鸞字歸與兒孫萬世傳後題萬
曆乙卯仲秋旬二日蓬原府夫人鄭氏敬次 主上
殿下賜詩玉韻柳氏贈詩曰叨侍宮闈卅九年翟瑜
徽典愧前賢忝逢 宣廟重興日更見吾王至德全
世亂幾忝龍御運時平長享鳳帷邊慈顏鶴髮通明
殿稱壽還驚寵渥偏蓋柳氏之配光海在 宣祖丁

亥至乙卯為廿九年也鄭氏次韻曰俗累塵緣惱暮
年一心聊慰壺儀賢永承再囑三清界賁化重歡二
聖全賜宴澳開金殿裡需雲繚繞老身邊關雎樛木
非全美更祝乾坤德不偏後題萬曆乙卯仲秋旬二
日蓬原府夫人臣鄭氏敬次內殿賜詩寶韻世子又
於八月旬八日製詩手寫以贈鄭氏一日通明殿裡
敞雲屏金燭輝煌映紫庭千載難逢今日會奉歡稱
壽拱深情其二日縹緲祥雲迷紫闕蕊籠佳氣繞楓
宸奉歡蘭殿情何盡薦壽華筵感轉新并光海柳氏
兩詩皆寫贈之鄭氏歸即作屏寶箴余於兒時因老

宮人聞其事矣 今上戊辰年間聞其屏在一士人家借而觀之筆法精熟而甚無氣骨鄭氏即余高祖林塘府君第二女也卒於萬曆庚申十二月初七日壽八十

○光海時男巫福同無鬚髭貌類媚人而語音亦行雌聲着婦人服出入宮禁為中壘禱疾設淫祀於通明殿而作假馬如國葬時竹散馬之狀列立庭中中官具朝服立其前宮女掌事者與福同交襍行祈禳事混淆無別如是者數矣後將復祀而福同以事被拘於捕廳受足杖之刑廢世子親抵書於捕盜大將

得解而入宮如前設祀云福同每出入郊外常有內司及別宮奴子後先導行一日到果川萬壽僧菴菴在余家墓山中奴還同時年十許歲往見之潛語人曰彼是出入宮禁交通內人者耶福同微聞之使人提曳以皮履批其頰殆死乃舍還同每言其事於余曹矣反正後福同死於刑戮

○故老能言光海時事者云有天官卽勢焰張甚朝士之通塞出其手有一求官者思有以媚之一日往見因言某家隣近有一妓甚都雅足下如欲一眄則當掃堂而邀吏卽首肯之為期日而送之至吏卽至

其家而其妓又適他其人恐得失信之責入語其妻曰我若得罪於吏郎則終身不得官爾可替妓而陪寢乎事在昏夜爾我之外復誰知之再三懇諭而其妻終不聽其人遂擁而納之其妻發聲以拒吏郎聞其聲即趨而歸歸語其事于人坐是廢棄

○光海時李爾瞻有駿馬名聞一國時柳希奮為本兵長使人乘夜潛入竊牽以來藏之園中爾瞻廣散僕隸大索累日終不得柳度其已疲還送之李驚駭絕倒其時卿宰以詐譎相制多類此云

○光海朝老宮人有以故紙裹珠紙有所錄物名余

取觀之則乃其時某邑倅進獻闕中者而所錄則大殿綿紬五十疋中殿四十疋東宮三十疋而金尚宮任昭容等諸寵姬各有所贈遺蓋都錄以送于金尚宮使之分進者也

○有長老之及見光海朝者為余言其時偽獄甚多上爰希功者無虛日有一人被逮而至乃無知村氓也掌鞠者問何為而作不軌事乎其人曰不軌事何謂也獄官曰謂謀逆也曰謀逆者何謂也曰圖為王耳其人愕然起立曰窮巷殘民賣柴糊口常恐不給何敢有圖王得國之心乎遂仰天誓之曰我有斯心

則狗子猫子也聞者悲之云曾見柳夢寅小說記其時事曰見飯匙稍巨於人則必上爰蓋實錄也

○余九歲時初八大內光海時老宮人尚多存者相與話舊而意余童騃不解聽語無所隱諸人咸曰光海主過於慎色一月之間幸後宮者不過十五日而世誤以好色稱之其冤甚矣噫自古太子諸王生長阿保之手不知傷生之道全無限節卒多夭折安知其不由於此等之說耶

○光海壬戌冬間昌慶宮通明殿中有謔書移御速速四字自空墮下如是者日數十度至明年三月十

二日乃止翌日 仁祖反正或者神鬼以告光海離
去此宮之期在速而人之不能解如偽蜀太平字耶
余兒時得聞此說於宮人而後聞許及第積之所言
亦如此蓋許之從妹有為光海後宮者故許知其時
事也曾經首相而不書官稱及第者削官未復故也
○老宮人春香乃光海時八 供奉者也以上命
來幹余家事為余言癸亥反正日夜三鼓有一宮女
號哭於庭中曰火光燭天喊聲又近禍已迫矣何不
奔避求生乎渠亦驚起出視則軍人之白布裹頭左
把火右持兵者遍滿禁地急向後苑則光海與五六

內侍十數宮女奔向北小門而內官以鑰開門即有人牽馬立侍乃光海寵姬金尚宮之奴而聞變意光海從後門出故韉馬來待也光海騎馬諸人隨後行至濟用監松峴光海八所不知人家諸人各自奔迸後聞其家乃醫官鄭柟壽家蓋隨後宮人中有柟壽族屬故引以入之云

○光海癸丑 仁穆金大妃與貞明公主處于西宮者十年天啓癸亥春侍婢一人忽發聲高唱曰三月某甲此門將開復見天日其有期乎宮中皆以狂至其日 仁祖奉大妃復位公主禮歸于永安尉洪公

柱元子孫成行福履冠諸主主子萬恢嘗以聞於其尊堂者為余道之如是

○癸亥反正日首相朴承宗書諸斥紙曰事君無狀致有今日何面目見先王於地下沉淵而死以謝天地鬼神將投水而不果焉至衿川三岳寺八卦僧房以繩絞項以其端投窓隙使其奴引以縊之奴跪曰奴何敢手殺主也死不敢朴曰吾不死於今日則為萬古罪人汝殺余為忠不殺則不忠也縷縷曉譬奴乃縊之而號哭不已是日其子京畿監司自興亦自縊於其寺中寺僧目見者嘗言吾於吾家宗丈云

○有兵曹老吏金峻者目見癸亥反正時事謂余曰
光海無道日甚天怒民怨嬖孺亦皆有曷喪之歎及
至舉義之日遜于江華行色慘然見者雖無知賤隸
無不傷心出涕而勲臣中傷惻者少快樂者多傷惻
者皆後為賢大夫快樂者皆不得令終云

○癸亥改王光海遜于江華後移喬桐及丙子年間
西報日急朝廷命移置濟州而嚴飭護行人使勿語
其所往之處船上四面皆障以帷幔使不能審看所
經地方俟到泊始告之時武臣李元老為護行別將
而水路艱險瀕死者數既泊彼岸去帷請下光海問

此為何地乃告以濟州光海愕然大感曰我何為到此我何為到此殆不能定情其時濟倅迎候於船泊之所聞是語跪進曰公子若於君臨之時介遠邪倭不使宦官宮妾干預朝廷則何以到此乎公子不見不修德舟中皆敵之語耶光海淚簌簌下不能語云李也與余伴直搃府言之如是

○申判書晟嘗語於青平沈都尉曰少時讀書于一空家小樓上其家舊主乃光海朝宰相而罪死於癸亥後者也其塗壁之紙多有當時遺跡剝而觀之則其中長書一通乃其宰之儕友戒勉其宰者也有曰

主上獵色荒于政金純輩聚歛而割民飢宮禁不嚴
倖門大開金尚宮任昭容之稱遠播京外邊帥守令
各有定價搢紳進退以金為媒四境嗷嗷舉懷曷喪
之心而土木工匠不絕於九重之內宗社危亡非朝
則夕西人切齒南人含怨小北非笑而公等不之知
唯欲安享富貴如是而能保富貴者未之有也勸
廢毋天地大變必也舍命爭斥以拆姦議以明倫紀
然後可以自立於覆載之間如不能然則領速掛冠
勇退云不知此書出於何人而縷縷所進皆是切實
之言故至今誦之不忘云余後聞金國舅清風公之

言亦言嘗於其家見此書云

○光海癸丑永昌大君璣以八歲稚兄椿棘喬桐終不良死方於就謫也沈相國喜壽來見余曾祖左相府君垂涕曰主上宜抱置大君於膝上啗以果實曰有賊欲害汝我在汝勿驚如是則可以慰先先王在天之靈而今反有此不忍為之事必不得保我邦家矣老身恨不早死衣袖盡濕云

○有任氏老人言光海後宮昭容任氏乃副提學蒙正之妾女而判書就正之姪也早喪父母養於其外家與任氏家絕不相聞及庚戌年方十三其外祖母

黃緣納宮就正方為原州牧聞以大駭書遺止之已
無及以此見忤於光海屢年不遷官既而稍進用竟
為門禍倘使任氏一門恒存驚駭之心一如初入之
時則豈有末稍之禍此可為後人戒故為言其事云
○光海朝有人以俚語為長歌名曰流民歎備陳民
間失所之狀流聞宮中光海為減鑪冶所徵炭之役
云其時老宮人言之

○光海宮人之流落者至老皆誦桃花梨花杏花發
南里北里西里春不寒不熱好時節半醉半醒無事
人之詩余問何以能誦則曰光海深喜此詩而常於

上林賞花之日必令諸姬吟咏以聽故能久而不忘耳仍淚下沾襟

○光海朝弘文館書吏金忠烈見寵姬金尚宮用事人心憤怨上疏曰赫赫宗周褒姒滅之我朝鮮三百年宗社金尚宮滅之臣為 殿下痛哭疏到政院論

議不一終至退斥而忠烈身在下賤言人所不敢言忠直之氣至今凜凜此無非祖宗崇獎言者之效也忠烈稍解詩律自號玉壘其子寶鼎為掖庭司鑰

顯廟丙午扈 駕溫陽登武科

○光海朝國舅柳公自新富貴已極子孫亦盛簪笏

盈前貂蟬滿坐譙集過從殆無虛日世稱福祿古今
無兩每於張樂歡樂之時輒有拍手羣笑之聲在於
半空曰盛哉宴也婦人之與宴者起立著履又有笑
聲曰足何大乎舉家歡喜皆謂天降大福鬼亦助歡
及至癸亥光海遜位諸柳誅竄戊辰柳公之孫前承
旨孝立謀逆伏刑舉族殆殲鬼笑之蓄其驗於此乎
昔劉伯龍家貧將營十一之方鬼見拍手伯龍歎曰
貧窮固有命遂止伯龍之悟柳氏之不悟可為後戒
矣其時與宴婦人之子今為大夫年老家居常親聞
於其慈堂云

○光海朝天使之來東者語譯輩曰李爾瞻許筠汝國貴臣而李則秋風泣女之相許則老狐被縛之狀其他宰相亦皆不吉而百僚之面帶殺氣者甚多汝國王其得無事乎未久而其皆驗是真善相人國者也其譯官之子以聞於其父者言於余

○癸亥舉義日光海見火光聞喊聲謂內侍曰易姓則必先火 宗廟廢立則 宗廟當安寧汝試登高望之內侍還曰 宗廟有火矣光海喟然歎曰李氏宗廟至我而滅矣遂與內侍跳出北門蓋光海常以進供柴薪積置於含春苑舉義時軍兵放火燒之

苑去 太廟甚近故內侍錯認 宗廟有火也伊時
宮女之親見者為余言之

○癸亥反正日縛致光海朝亂政之臣於闕門外有
奉常寺下人孝男者乘守者之困睡蹴韓纘男兩眉
曰汝能復困我乎纘男額鼻傷破幾至出血而不敢
出一言孝男仍欲更蹴之為守者所覺而止蓋兩日
前纘男受宮女之囑杖孝男故也掖庭司謁文得立
目見其事後言於余

○癸亥反正日韓纘男被縛倒地渴甚求飲於守卒
卒曰 大妃在西宮飢渴甚於汝今日而汝不曾進

一勺水我何以求汝渴哉纘男更不敢出言云訓練
老卒有目睹者言之

○光海時老宮人為余言廢主時宮女無不締結宰相名士各有所為主者宮女輩為其所屬有欲圖囑則必曰某宰與某女相交可因以通之允於官爵刑獄之類公相所請則宮女亦不諱秘直曰湏製一佩囊以來護簡以送則事無不成者伊時固視為尋常事到今思之廢主失位皆吾輩之罪也吾輩乃偏塞無知女人而猶有自怨自艾之意若使其時宰相名士生而聞吾輩此言則未知當作何懷云

○癸亥反正日光海從北門跳出中殿柳氏與數十宮女乘夜往後苑藏伏魚水堂中軍卒圍之數匝者兩日柳氏曰吾豈隱匿圖生者也使宮人宣言中殿在則宮人輩惶怖不敢出有韓姓保香者自請宣言乃出立階上曰中殿在此矣大將方倨胡床即起立而令軍卒稍退其陣韓有以柳氏意問曰主上既以失國新立者誰歟大將曰宣祖大王之孫而不敢言誰某矣韓又以已意問曰今日此舉為宗社耶為富貴耶大將曰宗社幾亡故吾輩不得不奉新王反正豈自為富貴也韓曰既以義為名則豈可餓殺

前王之妃也。大將聞此言，即報知于仁祖。飯供頗厚。云：宮人之同八魚水堂者，為余言之。

○老宮人又言：光海主偏狎宮姬環，以進退者五十餘人，而必欲盡得其歡心。人賜絹紬數十疋及綿布五十疋，內司不能供其費，益以買官者私獻之物，故其季年私獻日加。居官者之貪饕，皆由於此云。

○光海即位之初，廣置宮人，以求則百之慶。及其中年，夢有絳袍大官自天下告曰：王之殺人子多一子，且不保，何求多男子？是後，光海求斷產之方於中國術士之來東者，至施符祝。其時，宮人臨老垂淚曰：吾

輩於伊時欲生王子惡其符呪到今思之吾輩之終無產育者天之福我也。

○光海朝老宮人謂余曰伊時清道倅某乃士大夫家子弟而乃為奸巧事抵書於寵姬金尚宮而始則曰謹獻某物幾種以為轉達天聽之地末復曰欲知尚宮安否盡情作書云此則一男女交奸之書而金姬以其書及所獻物種進于光海光海覽而嘉褒之以為尋常事鄭夢弼以金姬族女夫黃緣交結至入于差備門內與金姬終日對語時有潜奸後宮之謗潜奸後宮則未有現著事而宮闈之不嚴如此安得

保有國家乎此皆吾輩一時貪得之致而使光海失國世子不得令終吾輩之罪萬死猶輕仍嗚咽不敢言

○癸亥反正日光海從北門出隱伏於濟用監松峴醫人鄭柟壽家蓋柟壽即宮人之族屬也時柟壽方在喪中使光海變着喪服潛藏於家中俄聞 仁祖改玉朝著日新知其終不可匿詣軍前告之 仁祖命以監輦擔到闕門之外光海尚著白皮耳掩低頭泯默而坐有勲臣之弟以慢語戲侮之伊時見者莫不憤惋而畏其勢焰不敢呵止後其不良死

○光海在濟州李延城時昉為牧使申飭厨人潔其膳羞以進光海喜其有異於前也曰此必前日受恩於余者也有老宮人随往者曰非也光海曰汝何以知之宮人曰爺爺黜陟臣僚一從後宮毀譽此倅若曾曲逕受恩者則必将薄待故主擬掩前日陰秘之跡豈敢致誠如此哉光海後知為時昉垂淚低頭羞見其宮人光海卒後宮人随往者歸言於舊時同伴故余得聞之盖時昉靖社元勲延平公之子亦叅勲籍封延誠君而光海朝未霑一命云

○光海之廢置也随往宮婢有性悍猾賊者供奉頗

不謹光海責之其人厲聲曰爺爺曾居至尊之時百
司八方逐月進供有何不足而索饌於無恥之流至
于沉菜判書雜菜叅判之語乎尚方以時節進錦布
毛裘有何不足而大開私獻之路至使象譯市井得
通仕路乎後宮之食資飲食亦各有該司之供有何
不足而索賂於求官訟獄者使民心大崩乎爺爺不
謹奉 宗社使國家至此而入此海島之後反責我
以不謹供奉能無內愧乎爺爺失位固所自取而吾
輩何罪因此荐棘中光海低頭無一語只咄咄而已
伊時見者皆莫不憤其言之悖慢謂必有天殃其人

後因他事果不良死云同八島中者後言於人故余得聞之

○有老宮人言癸亥靖社兵入宮宮中沸湯有戴紗帽者一人突入宮曰世子安在我是侍講院官員某也才見世子即背負趨去其面貌則依稀認得而姓名則終不記使臨亂效忠之臣姓名不傳可恨云

○光海時老宮人言光海於後宮常隱身深奧處使人搜覓不得則喜之得之則不悅常慮有變而試習藏身又嘗積置白金數百積於宮中慮或失位則用賂中朝以求復位者云余以是語質語老璫吳以恭

以恭曰誠有是事矣廢君不知位不保則銀亦不保其何能不失國也言之噓唏

○余曾祖水竹府君有別野在南郭外即林塘舊業也府君在光海朝不樂在京時或往居焉多植花樹每花發爛若錦繡府君妹子柳希奮文昌別置野於東墻之外園林相連一日柳奴踰墻而入偷折花枝將移植於柳園奴輩駭而奔告府君曰希奮豈使其奴斷移吾園之木也但其盈滿已極事變將至故奴輩之怙勢作孽如此有以造物使之不得自由者限滿則自止何必禁之任其取去也未幾其家果敗同

時朴承宗以首相當國且連姻王室富豪極一時其
妾子以童丱往遊於水落山衣服騎乘輝映巖谷見
胡燕作巢於山崖以蔚山半乾鰕魚戲擲其巢以觀
村人爭拾之狀蔚山鰕魚我東海味之最珍者也窮
儒寒士得見猶不易而彼則視同瓦礫無所吝惜驕
侈如此安得不亡乎二事雖殊大限將至迷不自省
同一致也

○金自兼妻李氏李延平貴女也早寡多讀方書出
家為比丘尼為宮女輩所敬服往來交結方癸亥靖
社時延平實主其事有知其事者上變告之光海命

設鞠廳邏捕四出禍將不測李氏抵書於光海寵姬
金尚宮曰吾父愛戴君父發於歌咏尚宮見此歌辭
則可知吾父平日心事金尚宮以其書展讀於光海
坐前滿紙辭說皆悽楚悲感之語遂告之曰愛君如
此而枉被刑戮則其為冤酷將何如光海聞而然之
緩其鞠事義兵乃以其日三更掃清宮闈云老宮人
親見者後言於余

○有柳氏老人言柳丈希奮為儒生時常攝木屐徘徊
於人家古墓偶內逼脫屐置前登石礎放便屐上
忽有血書五字曰嗟君萬里行柳氏心異之後遭壬

辰倭亂扈駕西行中鐵丸洞腹而猶得全及至光海
朝由戚里至隆秩以文昌府院君兼判兵書時國家
富饒由事豐豫而柳氏一門金貂盈堂而歌舞酣宴
無日無之柳丈之大人伊時國舅公第有樓封鐫甚
固而有新屠馬脚在樓中流血淋漓其事甚怪而其
家亦不之恤也暨癸亥反正日柳丈被補萬里峴人
家不免大辟血書之徵至此始驗而子姪之刑戮者
前後相續曩日中九而不死者意者留待癸亥之禍
而樓上馬脚其柳公子孫血肉狼藉之兆瞰室之鬼
未嘗不先期開示而迷昏於富貴豪奢之中不覺察

自就覆滅何敢怨天尤人也

○仁嬪金氏乃監察漢祐之女而元宗大王之母也宣廟朝被遇特隆生四王子五王子女常呼以母氏則嬪蹀躞不自安曰國家不幸坤殿無誕育而吾輩有子女不過借腹以生而已吾豈敢為君輩之母也常若不敢當而亦不敢以爾汝呼子女其謙德如是天豈不畀之以無疆之福耶余嘗聞此語於老宮人及聞徐領相文重之言亦符前聞徐公即嬪第一女貞慎翁主之孫也

○綾原大君第有一老婢逮事章陵者也平生患

膏痛苦甚至死不能愈常曰

元宗在定邸有新及

第者來謁命給優人一端布宮中無所儲遍貸隣家而亦不得以致遲延元廟屢促之吾於門外徊徨等待既久僅得之潛自墻底水道投納于內以之出給而其時過用心慮氣結成疾至今為苦矣且曰

元廟以王子至尊貴也而不能備一端布尚無歎歎意今年少公子輩米穀金帛堆滿廩藏而猶未自足如是而能無禍耶每以此戒勉章陵諸孫云

○壬辰之亂倭賊遍滿國中至於七八年之久士大夫婦女多有被掠者及至賊退免禍之家不欲與遭

變者連姻 宣祖憂之曰此風若長舉國大家殆無
完全者矣力勸宗室貴戚結婚於遭變之家自後無
敢區別疵累者當光海朝有庭請廢母之舉宗室百
官多有畏禍不敢異者逮 仁祖改王有追罪之議
仁祖下教曰庭請之罪予亦難免議者不敢復言
兩朝鎮定調劑之道前後一揆矣青平沈都尉聞
兩朝聖教於其先相國言於余故并記之

○光海朝己未年間綾昌見罹於逆獄 仁祖在綾
陽邸圖其生萬方柳希奮有寵妾乘時索賂罔有紀
極 仁祖傾財以遺而猶未滿望柳常赴其妹夫趙

國弼江亭之宴 仁祖踵往求見柳辭以醉不肯迎
接趙勸之曰綾陽王孫也為活其弟辛勤來訪於十
里之外情亦憾矣公何以不見乎柳猶不聽趙自出
迎謁曰文昌中酒不省事而日晚路遠王孫不暇有
飢渴之憂乎因以杯盤進及反正初朝臣有以希奮
之不助廢毋論欲活之者 仁祖下教曰三昌之罪
豈容異同柳終不免大辟蓋自惡妾致也趙之江亭
今為青平沈都尉所有焉密昌朴承宗廣昌李爾瞻
文昌柳希奮是為三昌乃其勲號而皆封府院君柳
妾安岳郡妓柳死之後自經死

○國舅延興金公即 仁穆大妃之考也於光海癸丑因偽獄賜藥死既葬之後發戮其屍幽其夫人盧氏于濟州絕島中時火焰方熾人無敢入見者達城尉徐公景霄以姻家之誼指揮一二親戚收屍斂棺殯於密室閉門恭棺權厝某地盧夫人在謫十餘年望絕生還一日有鵲飛到簷前查查不已如報喜狀夫人歎曰家破人亡有何喜事而鵲報如是也蓋鵲非海島所有而忽有之人皆異之聚觀咨嗟俄傳仁祖改王而承旨奉 大妃徽音為迎夫人來泊朝天館一島懽呼審問鵲所從來則船人有言船發南

海明有鵲坐檣竿將近津頭忽然南翔而不知去處
矣始知其先使者報喜如此

○仁穆大妃既復位以手筆抵書于達城歷舉其恭
棺事以謝之云達城 宣祖朝儀嬪也延興達城兩
公後世言之如是

○仁祖慎賞罰惜名器嘖笑不苟李馨益朴頤俱以
醫術承眷馨益至於夜半獨為八診而頤不過六品
主簿馨益僅至正三品散秩此非後世之所當法者
也且 聖度凝重簡嘿宮人昵侍者不得頻聞 天
語羣臣亦莫測 天意深淺若得一字褒貶以為終

身斷案而大內所御床榻未尚加以丹絳其儉德又如此先君翼憲公常謂不肖等曰後世嗣王不必遠學堯舜只法 仁祖足矣

○光海之遜于海島也朝廷為置其姬妾數三人於栴棘中以供奉之後有中使於其室中得一紙以進乃婦人書而只訊安否而已 仁祖以內外不嚴罪守者又拿同室光海妾稱任昭容者鞠之殿庭而終不知其書之出於誰某時申文貞公欽謂鞠廳諸宰曰吾輩目見舊主寵姬被刑訊而不能止又從而莅其刑後世必有議也又廢世子祔與其配廢嬪朴氏

拊棘江華朴以熨刀闕地作突推廢人出送既出不
知所向彷徨間為守者所覺臺諫啓請正法李文忠
公元翼言此事雖自上施罪而臣下有當爭執今
乃自下請殺不但於事理有所不忍而亦非開示來
世之道歎咄不已及自上下問終始以全恩仰對
而臺請不止竟賜死今上壬戌奉常判官鄭維惲
上疏請以王孫例封爵追封之而朝議格不行申公
號象村李公號梧里

○有老宮人常言廢世子祔之將死也 仁烈王后
告 仁祖曰祔罪之可生可死非婦人所知而國之

興亡在於德之修否德之修否係於心之操舍心之
操舍決於俄頃故古有朝天子暮為匹夫而不可得
者 殿下之操心不如今日則安知後有賢於 殿
下者乎前人所為後人效之願勿殺祗以為他日我
子孫保全之計 仁祖墮淚傾聽而勲臣及臺官力
請按法云

○光海末年完平李相國元翼退居驪州仰德里改
玉曰 仁祖拜為首相遣近侍召之光海時權臣之
有罪者將待公正其生死其中一宰臣有寵妾以所
躡珠履納公側室以丐命側室持以告公公垂淚曰

使臣下有此物其君安得不亡使姬妾着此物其人安得不死乎

○仁祖化家之日宮女之可堪職事者倉卒無以備數命光海舊宮人年老無罪者八內供奉有韓氏名保香者不能忘舊主有時切切悲泣同列者密告于仁祖王后曰某也追思舊主恐其有變也 后曰此義人也召韓慰籍甚至曰國家興廢無常 吾王賴天之靈雖得有今日安知後日復不如光海之失之乎爾之衷心如此可以阿保吾子命為保母尚宮且錫胡椒一斗而引言者撻之曰觀汝今日之為可

知他日之心仍諭諸宮女曰爾輩毋效此人韓氏感
激流涕其舊人之不自安者皆釋然歸服務盡誠余
內公主之保母金氏即光海朝進環人也目見其事
常言之垂涕

○金右相文忠公錫胄 明聖大妃伯父忠肅公佐

明之子也甲寅後以國戚長本兵兼御營大將時首
相許積有孽子堅其所親者以堅所謀不執事來告
金相金相因內侍啓于 上出一番人起鞠獄次第
定罪遂錄保社勲封清城府院君 明聖王后以諱
書戒相國曰吾家世遵清儉固守窮約至於卿身既

拜司馬兼帶大將又封勲爵余甚憂懼不能安寢矣
因內侍告密雖由於萬不獲已一之不可決不可仍
以爲例也事不守經務爲權宜則不但得罪於公議
主上亦必有不是之心君心既厭之後吾於主上
爲毋無可救之道矣小心奉職初不抵罪可也天王
家與士庶家不同罪狀彰著則雖至親之間亦不得
免焉故余有一女明安公主甚愛之主上亦甚友
愛而余每以謹慎毋作過爲戒矣諸臣朋比之習雖
曰可惡而自君父視之同是臣子人命多死則不祥
莫大說與諸臣治獄之時務得寬大宜矣如此等教

丁寧懇惻不啻累百言而多不能記直令人一字一涕也金右尹為余言之余以是問金相金相出諸箱中以示之金公號息菴至己巳削勲追棄官爵甲戌復官賜祭

○孝廟於戊戌年間常有下堂之憂久而不瘳口味屢爽思嘗異物而慮致民弊不責該司使諸公子及宦官宮女家隨得以獻厚直酬之不煩民力而諸物畢至翌年龍馭賓天自後遂不無援以為例者數十年來其弊尤甚雖閭巷賤流得異物則必獻之獻之必致直至於希望異數遂有不尊九重之意生心僥

偉曰加一日古人所謂差之毫末謬以千里者豈虛語哉夫責之該司不過市民一時奔走之勞而事過則已寧有今日之弊哉

○孝廟丙申余八大內聞老宮人老璫輩所言則闕中侈靡視祖宗朝倍加逮余婚禮之日又見諸公主服飾曰祖宗朝王女則未嘗有此等服飾云而近觀諸貴主家帳御飲食服用不啻十倍於其時未知前頭更增幾許也且記婚禮時尊貴家婦女赴筵者甚多而其中隣平大君夫人及淑安淑明淑徽三公主外無用繡鳳宵背者可見等威之猶存而今則

士夫家尋常宴席士夫庶孽之妻女亦着繡鳳宵背亦可以觀世變矣丙申拒今未過五十年而以其時御室御服較之即今諸王子女居處則大有所不及者矣

○明聖金大妃於庚申後使弟 傳言于金 相

曰 主上春秋方富域內姑無盜賊邊境亦且安逸當得謹慎之人付之兵權使其持重鎮安而已此時將任不可受諸求進之人必以固辭求退者處之能知固辭必知將兵任重能知將兵任重則能小心不鮮矣

○淑徽公主嘗請得一繡裳 孝廟下教曰吾方君
臨一國欲以儉示先豈可令女着繡裳乎吾千秋萬
歲後余慈氏為大妃則汝雖着此人不深咎姑待他
日可也終不許淑徽公主以丙子十月二十七日棄
世其姊淑明公主點檢衣服舉繡裳痛言其事如此
○今上二十七年辛巳三月二十七日晝講時承旨
李世載陳于榻前曰光海君墓在揚州牧其外孫奉
祀者將欲加土而以事力不逮請得役丁訴于禮曹
及備局而不為啓達故臣敢仰達矣光海廢置後
仁祖聞其疾病則必賜其藥物及其沒宰臣以治

喪不謹至為陳疏今為墳墓加土時宜有助役之道
矣 上可之命給役夫

○有長老言趙靜菴當 中宗朝以弼違格非為已
任其於諫爭之際不得俞音則不止且疾惡揚善無
回避一友人語之曰公雖有龍逢比干之風而得無
乖明哲保身之道乎靜菴曰吾以直道事君幸以生
則生矣不幸而死則死矣禍福在天吾何畏焉 宣
廟之時李退溪禮遇甚隆而退溪造朝甚稀來亦即
歸或問之曰 主上之待公無異於昭烈之待武侯
未常久留者何也退溪曰唐虞之際君臣契合千古

罕比而猶有都俞吁咈之辭今者主上於老臣之言不問可否輒皆從之吾是以不敢留耳兩公處身之不同如此而俱為正人君子云靜菴文正公光祖別號退溪文純公滉之別號也

○余於幼時聞諸長老之語曰燕山朝有一臺臣家在仁川聞新除臺職告于父母曰國事日就危亡吾欲進驚言以悟君聽兩親在堂不敢自輕父母曰汝既許身於國可死一任汝心無以我為念也其人既辭其親訣其妻而色不動及見十許歲女子牽衣啼哭不覺墮淚而不變初志割慈上京上疏極諫被刑

而死其能辦死生不愧於龍逢比干余時幼穉聞其姓名而忘不能記可恨

○礪城尉宋文瑞公寅號願菴 中廟朝儀賓也時有戚里喜事貪權責人以已所不能為者故疾之者多願菴因其來訪戒之曰外朝之臣自當持清議任怨故言不用行不合則奉身而退而吾與君則處地絕異既不可遠離輦下自內有私賜與則自我不得不有私進獻宮中有事則妻女子婦亦當承命入見豈外朝臣子之所擬者乎大凡人情雖不要寵亦不欲得罪是以不能無苟順 上旨者故雖自謂簡嚴

之人而宮女輩有請則僅能遊辭繡縫而終不能據理嚴斥已所以自持者不免疲敝而反以繩墨責人怨安得不生且歷代帝王雖不能不以權與人而權之所在忌心必萌戚聯天家者惟當奉公守法一心王室持身無愧而已古人云怨可解不可結怨多則讒多讒多則禍至自古貴遊之家多不得保全者皆由於怨多也余前祖母乃順菴公之曾孫故得聞家間流傳之言

○宣廟朝完平李相國元翼初入臺閣以簠簋不歸彈尹海源斗壽後因公事往謁海源同源無幾微見

於色留與語曰貧族之行婚遭喪者皆責具於我為副其饋凡有饋遺不得不領留臺啓之發理所當然吾何介意酬酢良久言皆由中適有鄉族乞婚需書尹公即命侍婢曰頃日譯官某有所餉匹段爾其取來侍婢入而復還曰本無是物矣公笑曰婦人輩以公在座欲諱之耳促令取出全封畀之略不動色李公服其偉量終身敬重焉完平後孫至今稱道之

○李栗谷掌銓時以銓曹事往時相某公第受薦望而忘持紙硯某公言其失體因其陪吏人有為栗谷介懷者栗谷曰我既失體丞相之責我自是相府體

例事也吾何憾焉栗谷文成公珥別號也

○癸亥反正之夜八直諸臣蒼黃奔避各自圖生李竹憲德涇時以都承旨在中撓攘之中連聲請于仁祖曰願活舊主願活舊主涕淚橫流嗚咽不能成語他日仁祖下教曰李德涇之忠義予於舉義日知之矣李公卒於仁祖朝官至貳相

○金判書蓋國仁祖朝為戶曹判書時有進銀中朝事金公敬其事不委下吏親自封監有美負一人在傍瞰金公之轉眄時採取一塊即起超出有若便旋者潛置他所而還入舊坐人無知者獨公覺之而

佯若不知即命罷坐曰痾病欲發不可久坐命置其銀於一房使其筭負守之以待明日開衙以封筭負自念銀不準數咎將歸渠不得已以所竊者還置其中翌日監封數無欠縮後十餘日金公不彰其罪以微事適其任人莫不服其雅量

○政府掌藥官朴時亮常於朝夕時值路泥加着大分套以護靴子大分套乃大皮履之俗名也富譯張弘造家舍用附掾皆國制所禁者金清陰尚憲為都憲因兩人將治之時亮素習於吳楸灘允謙而吳公與金公文厚時亮妻子乞命於吳公吳公曰雖吾子

犯法金公必不容貸何敢有圖囑之計哉心甚憐之而終不敢出一語以救之兩人終受刑訊金公之見憚儕流如此有公子造山亭用圓柱聞金公為都憲即削而方之蓋殿閣用圓柱故私家不敢為也金公相 仁孝兩朝配享廟庭

○崇禎丁丑先君翼憲公為忠清監司與諸宰往復簡牘成積卷軸其中有遲川崔相國鳴吉書數十張皆以國事勉之而乃曰吾在廟堂令公按湖西不以此時救民則湖西之民更無蘓殘之期毋蘓煩復悉心錄聞則我當盡心以助云前後辭意皆憂國救民

之事無一言及於私先輩殫心國事如此

○先君有姑婿某以蔭仕發身救為一縣時完城崔公為吏曹先君迫於姑命往請之公曰吾之前後除官豈敢云盡得其人而但能不愧於吾心而已此人其能稱此職乎竟不一擬先君每舉此事告于子弟曰崔相於吾言未常不從而至其不可為處則確然如此此其不可及者云完城逢川相國勲號也

○綾原大君備 仁祖大王母弟也其家善於烹飪

仁祖常下河豚使之烹飪趁明朝進膳而進之綾原親自炊火夫人躬執俎達宵守鼎頃刻不離而凡

於事係 大內者則勿論大小致謹皆類此云綾原
卒于丙申元日 孝廟親臨其第舉哀

○梧里李相國元翼釋褐隸習漢語專意講習後值
壬辰倭亂車駕西巡天兵東征使命旁午事機糾紛
而譯胥所解不過水火寒暄而已彼此旨意百不通
一李公時為關西伯接應酬酢一無碍滯天將大喜
曰莫是漢人耶於其恢攘之際大有所賴始公以書
狀官赴京有舌人於使臣與禮部官相接之時變幻
辭說有所要求意謂使臣未解華語也公默若不知
者還到山海關逢華儒探討經史問答如流舌人伏

地叩頭曰死不足償罪願乞縲命公亦默然不答及登台司兼帶司譯院都提調凡諸譯院公事皆令以漢語稟定由是人皆自力大為國家之用云

○有一長老言靖社勲臣中多英豪文學之人而仁祖之倚重終不如完平李公至於李延陽時白則其忠槩尤著稱而猶以凡常功臣視之及丙戌尼山土賊之變延陽自請督戰自闕下直赴官廨即日啓行終不入其家 上後知其事始乃嘉褒於引對羣臣之時以延陽之盡悴謹慎受知之晚如此則況其不及者哉世之欲但以功業深結主知者可以為戒完

平梧里相國勲號也

○先君在首揆宋相國時烈列錄國朝忠臣義士袖之以來曰褒忠獎節固是國家令典而至於嚴興道以一介微賤之人盡忠於魯山尤可聳動千古收錄其後孫以戎來世則安知舍命殉節之士不由斯而出耶余聽之至今惻愴宋公號允齋

○鄭都憲弘溟號畸翁嘗以試官入試院語同僚曰奉君命試多士而容私於其間其心足為逆賊其時同事長老言於後生故余聞之

宣廟朝儀賓全昌尉柳公廷亮有宏量幹才嘗納

伶官孫某女為妾而非其願也余先君左議政府君
時居臺職論劾之柳公子叅判諗與先考相遇輒避
不見一日先考往拜柳公公命叅判出見屢促而後
始出柳公戒之曰吾實犯科鄭公論之當矣鄭門不
以私惡中人故視我無異於昔吾何有憾自今日往
來如舊勿以介意叅判不敢違遂相友如初人服柳
公為長者先考益敬事焉柳公預料物之貴賤指教
家僮貿遷獲利積貯米布以恤親族之窮乏者月給
廩餼且助婚喪待而舉火者幾七十家其殖利非為
已也而人有訾之者蓋不能詳知而然矣論人其可

易乎柳公被彈在 仁祖朝

○許丈積於余左相府君先考為執友曾經領議政少時家甚貧親戚遠來亦不得供飯及至顯達所得恩賜盡歸朋友且於所管府捐出剩餘接濟親舊有病則必躬問而遺之藥待而舉火者常不下十餘人皆以意氣稱之實有人所不及者而李相國浣語余先君曰古人食祿千鍾什九在外者謂以所得常祿分而與之也汝車則專欲恤窮愛族不能遵守法度惠及親戚弊歸公家汝車終必以意氣見敗矣至庚申坐其子謀逆賜死而蓋款接雜客好行施與乃

其敗亡之本也李相之言至是果驗汝車許丈之字也

○顯廟嘗於經筵講湯武革命事筵臣權認進曰臣子則當以盡忠死節為心而人君則當以我不修德天下豈無湯武之意存諸胷中然後可以安保邦國矣上曰言甚切實

○趙承旨胤錫 莊烈大妃之兄也溫良謹慎無所營為禁絕妻孥不敢有一毫干澤事及承旨沒後家事饒於前人以是益知承旨之賢

○崇禎庚午先君作宰通津曾祖考府君抵書曰親

舊求乞酬應誠難而一則濟人之術一則度厄之方
有則給之無則不給而已以此為念勿示厭苦之色
云

○宣廟朝鄭西川崑壽為判義禁余曾祖水竹公為
同義禁而與他僚同監杖武人之犯贓者有一僚負
駭其杖之不猛下語之曰王府之杖固如是乎鄭公
曰年少僚宰之言固是矣而王府乃士大夫就理之
所也重杖貪贓武夫快則快矣一成規例則豈無吾
輩亦不免之悔也其人深服之

○廢主光海夫人柳氏乃余曾祖水竹公之妹女也

光海時國有鞠獄時或問公公心知其冤則於被鞠者毋論士夫賤人申暴於力所可及處前後陰活者不知其幾而未嘗以德色示於家間故子弟亦不知其所活誰某也崔大憲有源門巷相對揣而知之言於人曰有德於人而不欲使其人知之者唯見鄭相國一人耳

○仁祖朝有儒生疏斥三公曰廟堂謀猷如劉孫草笠尹領相昉笑曰劉孫草笠猶成形體吾輩於時事做樣且不得時以為長者之言蓋劉孫草笠工之以手拙著名故凡器物之麁劣僅成者東俗輒曰劉孫

草笠云

○李相國浣武宰鷄林府院君守一之子也相國少時侍鷄林語曰武官某為倡供役親自挿籬子不欲與之為伍矣鷄林曰無諸已而後可以非諸人汝父少時亦有是事耳相國不敢復言其推恕戒飭之言真有長者之風也鷄林 仁祖朝勲臣也

○孝廟丁酉余年十餘始冠入見 上賜玉簪挿髻又賜青金倭扇余受賜而出與伯氏觀璿璣玉衡於圻營白軒李相國景奭適在座見余扇曰年少兒郎血氣未定何執此侈物為旋見玉簪之在頭又責之

以服義且令伯氏近前累言從儉之意伯氏答以
上賜故不敢違耳相國曰 上雖賜之而我誠不欲
則 上亦不必我違也懇懇陳戒不已余於其時雖
聞其言而不知其為藥石也稍壯始覺之深戒其愛
人以德之恩服膺不忘云

○潛谷金文貞公消居第在終南山下余幼時以里
中兒數往拜之獲蒙撫頂之恩文貞天性儉約雖身
為上相連姻宮禁而食不重肉親執鄙事未嘗以尊
貴自處雪峯姜判樞栢年一間茅屋不蔽風雨而惟
以文史自娛終身不改金公卒于 孝廟戊戌姜公

卒于今 上辛酉

○金叅贊壽賢寬緩不苛崇禎壬申為某曹叅判遭
仁穆大妃國哀各司例送白布帽以分而期促工
少未及畢造吏以金公必不罪我也以其先造者盡
納于左僚及下官之喜捶撻者金公獨以紙帽成服
笑謂同僚曰柔善者何罪余先君翼憲公常稱長者
舉以訓余 金判書與諸僚赴殿最之坐杯盤並進
而在金公前者饌品絕異蓋畏其剛嚴也判書見而
不安重杖掌饌之吏余先考左議政府君未入閣時
同赴其坐歸家戒余曰判書不以待已特殊為喜後

輩不可不知

○余先君在幼少時受詩經論孟於柳進士景緝一日往請益切值柳公在僕隸陋室監銀工役柳公引先君坐其傍講論以送蓋柳公有叔父將行婚禮召匠造簪珥之屬而令柳公監之柳公敬其命不敢離也其時士夫家法之嚴皆如此今則子不嚴父詔弟不順兄教其有能讀數十卷書者輒有名諸父之意豈使執鄙事供命令乎時柳公方為太學掌議後登第官至方伯卒于 孝廟丙申壽七十

○咸陵府院君李公澣靖社功臣也傲睨軒冕務自

放逸裸程身體不事檢束余於少時異其為人也嘗
質之先君先君笑曰李公故自有意兒輩何知及稍
長復舉以問先君曰余始議反正之日諸人皆以安
宗杜保民生為說故李公樂聞而與焉及至勲業
已成多有不能踐其言者至聚籍沒家器皿衣服之
類日日聚會親自分之李公見其瑣屑貪鄙之狀羞
愧欲死自廢終身以明素志豈可執其跡而論其所
存乎余於是始得釋然李公第在好賢坊距余先第
僅數百步余於髫歲日往遊戲習見李公居處故有
是聞耳

○趙判樞綱清儉刻苦南政丞以雄豪放佚氣味不同而交誼甚密人有問於判樞者曰凡人之相交者必志趨相符而後可以不渝而公與南公志不同而交深何也判樞笑曰我天性近隘故樂南之寬南則和而流故取我之儉是以相好云趙公卒于顯廟朝

○李冢宰慶徽與徐兵書必遠資性相反而情好特至雖論議有時不同不肯苟合而交誼則終始不變徐公深感之及冢宰沒為營其葬至躬自相山云兩宰皆卒于顯廟朝

○光海朝朴承宗為首相常置砒礪大如鴨卵者於佩囊中曰遭時不幸朝夕待死安可無此物也每閑居靜處輒噓唏不自勝沈相國之源公一家婦人有為朴之子婦者故相國詳知之言于人

○領議政延陽李公時白世守清儉一日聞其夫人措置錦線方席大驚命鋪蒲薦於庭下揖夫人共坐曰此是吾舊時所籍者也際會風雲濫承公卿凜凜危懍恐致傾覆豈可以奢靡而促之哉蒲席猶不安况於錦席乎恨責不已夫人愧謝即毀棄之云李公卒于顯廟庚子壽八十

綾城具公 仁獻王后之弟也戚聯椒掖致身勲
貴而孜孜奉公一心國事其判刑曹裁決訟獄必期
平允金同知光燦曾為郎僚目覩而語於家庭故其
胤金領相壽恒言於余

○癸亥改王之日李白洲明漢以知製教被召入闕
見一勲臣子困卧殿庭磚石字號白洲曰天章何如
白洲進至一處則谿谷張公出而執手曰不忍坐視
宗社之淪亡不得不為此舉而慙負天地無以為
顏因涕泣橫流蓋奉新王安社稷雖行伊霍之事黜
舊君變宮闈亦天地間大傷心處也至周甲癸亥巡

臣請賜勲臣子孫米布後勲臣子孫會于勲府大張
聲樂設宴而樂之人謂若使張公在世必不令子孫
赴其宴矣張公諱維 仁宣王后之考也

○余先君在相位李判書世華以槐院正字因公來
謁而命下人取紙硯先君曰正字自持來判書大有
不悅色退言於余從兄翰林載海氏曰相公使我替
行下吏事得無太薄乎翰林曰相位禮絕百僚兵戶
判有關則吏曹判書躬受薦剡于大臣而必有執簿
奉硯冢宰之尊尚如此槐院正字不過九品微官耳
親執筆硯何足愧乎判書大驚曰生長鄉曲未諳朝

家體禮今不聞君言則終何以覺其非乎自此訪問
國家典故躬先行之仍以謹恪著名於世云矣判書
於已已廢妃之日與吳忠貞斗寅朴應教恭輔同受
訊杖獨不死後長吏兵曹兼判金吾已卯以年七十
入耆老所自是托疾不出更不着朝衣

○許積以首相都體察使開府城中抄擇幕僚以計
慮才識文筆膂力貨殖等名色俱收並蓄京外雜流
各效其能門閭如市閔相國熙訪余謂之曰許相精
神過人故雖有粗率之病而識見明透到今年老智
衰且為惡子所誤全不覺悟已可寒心而最是雜客

盈門必敗之道也許台於公之一家常自信服公一
開口言其不可則必即悔悟余曰台監可言而不言
使余言之者何也閔相曰許台之待公家有異於視
吾輩公之一言必勝於吾輩百言故也余曰我是少
日床下拜者吾言安能動其聽乎閔相默然良久乃
曰彼不得悟吾不能言公亦不肯言將見其敗耳為
之含淚居數年而果敗余到今追思言雖不用當盡
在我之責而知其不可行而不言坐見其敗幽明之
間不能無愧

○今 上巳未有江都築城之後有匿名投書于監

築者邀與同逆監築者上其書朝家廣加購捕久而始得設鞠治之時宰欲加以周紐之刑以期得情周紐者乃治盜之酷法建大木于兩腳之間以索絞腳上下左右引索則脚曲如環盜無不服李及第元禎時居宰列大言于朝曰鞠逆自有祖宗朝定制而韓上黨明澮創設烙刑至今流毒今何可又創新法乎况為法自弊古語亦可戒也周紐之刑賴以不行至己巳朴學士泰輔諫廢妃備受烙刑訊刑壓刑而辭愈直有金吾老卒流涕語人曰己未若創周紐之刑朴學士亦將不得免也李及第曾經一品判書而

收職牒故不書其官

○余兒時聞諸老璫相語曰嶺南士族有天閤者內侍毋取之為養子其族屬絕不與通 仁祖朝閤之叔父為承旨直闕中閤方籍內府在禁中以所得柑橘若干枚乘時進之承旨曰南北寺不得相通國法也既不受柑橘又不令往來其家終不相面而死承旨之守法如此可畏哉余聞承旨之名而今不能紀得可恨

○朴承宗子自興乃爾瞻之女婿也承宗微聞爾瞻有廢母后之意而未知虛實與之對語適有一鳥止

于庭樹鼓翼而鳴承宗曰彼雖禽鳥而能知反哺不可賤視之爾瞻默而不答偶有飛蜂過前即曰此是微虫而能知君臣之義不可輕視之承宗知其意之牢不可回始與之貳云

○林慶業初為南邑守以官米百石買駿馬一匹而馬有超逸之才一境之內喧謗不已慶業微聞之乃令邑中善射者射的較藝及至期日以其馬韉新造鞍勒繫之官街垂柳曰中者當以此酬之有一人中之輒予之於是譽聲騰布流傳都下有先輩聞之曰慶業此舉手段甚濶若此不已難保有終矣及丙子

後朝廷不忘尊周之義欲以一介道達情實於明朝而無可送者慶業募僧人名獨步者以木道至京師崇禎皇帝大嘉其誠賜僧名麗忠後為清人所覺使我國繫送慶業慶業中途脫走航海赴南朝及南朝敗為清人所得還之我國 仁祖大王雖憐其心而形禁勢格不得不囚訊終死於拊楊之下人皆悲之今 上庚辰因其後孫叫寃議于大臣 命復其官而曾經兵使為二品職故禮曹據例遣官致祭

○余仲氏右相公才踰成童委禽于南邑見武弁某甲目不識丁亦無父兄師友之得而齊家之道極有

法度男女有別閨門嚴肅鄉里儒生亦取而為則累
年後仲氏讀書於圻內山寺偶逢其武弁而適值雨
下數日聯枕仍問君以弓馬發身未常學書而治家
有法能使鄉中儒生敬仰何也武弁面頸發赤欲語
未語者良久仲氏固問則曰我於年少時訪從妹之
居窮僻處者對語良久從妹忽面紅氣急將突前把
我我見其狀即起而出来蓋以其人容貌甚陋故我
得免於禽犢之歸若使其人有妖艷之態可以動人
者則我心亦不可自保也自遭此變以來心亂不能
定後往鄉先生家坐傍造矢先生教童子七年男女

不同席之文童子問始自七歲而不同席何義也先生曰男女之慾大故必自幼歲遠而別之乃所以防禁私心也余聞此語而始大悟心口相語曰若早聞此語從妹獨居之地豈輕到手即請於先生以謚文翻譯聖訓中男女有別之文伏而讀之行於家庭故今為一鄉所矜式而人無知我所以致此者有由也我觀秀才他日必為宰相余乃吐露肝膽云

○顯宗時宗室某兄弟與諸公子遊漢江設饌方丈大張聲樂凡三日而罷方宴有蒼頭携酒壘從船舷而過失足墮死而宴自若老鑑鄭弘洲聞而歎曰某

公兄弟其將不得令終矣人問其故弘淵曰光海朝柳國舅新第落成行杯女奴跌仆樓板板觸陰戶即死而終不撤宴人謂不吉之兆今日所為何其近於是耶其言果驗

○外棺着叅只行於大行之喪而自餘則雖王子女之貴只用本色之槨所以存大防也今上丙子年間有倭譯某姓遭妻喪叅外槨如國喪之例宰相臺諫聞而駭之而其人積累十萬金能隨處通門故竟無糾正者識者為國家憂歎

○延陽李公語人曰癸亥改王之際賤流之奔走陪

衛者多蒙褒酬之恩而意欲無限輕視朝廷宗社重安雖賴其力而下凌上替自此始矣

○崇禎丙子清兵之亂我國人民之係累者不可僂指而或有婦人並被掠擄者則清兵憐而不棄其妻故雖娼妓賤婦亦有得免者士子之被虜贖還者歸言於人此必其國紀律嚴明而然也以夷狄入中國久享天祿有以也夫

○萬曆壬辰有士族子某年十五娶妻三日而遭亂被擄其妻認為死於兵服喪三年仍居舅姑之側數十年後某自倭逃歸顏貌聲音變作他人其父母亦

不能卞聚族而謀之一人曰某也與其妻同處者三日中宵交會之間必有他人所不知之事置之異室各徵其言言若符合則可知其非誣也父母以為然父問其子毋問其婦三夜交驩之事悉陳無隱而子與婦之言相符如契遂為夫婦如初當時皆稱其周詳蓋於其時有遭此變而輕使合歡致有後悔者故稱此為善處云

○烏城君宗室也以青樓酒肆為生涯得豪俠稱年迫八十余常問之曰公之為俠斜行為人所誘而不能拔乎抑生性放佚不能自制而然乎烏城默然良

久太息而曰自吾幼稚至于弱冠而未嘗一蹈邪逕
若守靜處子見人輒羞不能舉頭一日隣居武人誑
余遊觀至一處則乃妓館也琴歌喧闐觥籌交錯心
頗赧澁欲為還歸而為諸人挽止既久稍安俄而妓
忽脫衫搔癢見酥乳豐軟玉肌濃膩狂心火起不能
忍耐終至交寢而後已自此流蕩忘反以至於人視
禽犢使吾至此者皆當日一乳之祟而武人使之也
始知河間淫婦本非不貞者人家年少子弟以我為
戒必慎其所與遊而且禁於未萌可矣為之慨歎不
已

○叅奉宋德基獲習於余先君嘗言其先祖與羽士
田禹治情親有宰相子要與偕往禹治所問平生休
咎禹治曰某年退居鄉谷某年不求官某年不出門
不交某人不求得他人財物積穀無過幾石臧獲無
過幾人樂在其中否則必有大禍其人曰吾之所欲
知者富貴榮達之事而子之所言一無及之者然則
終無通利之時乎禹治曰吾能指人可安之道而已
進取榮顯則有天命惟當守道而行無違天心則祿
在其中矣輕信術家之言而逆天違人勇於進取者
初若有得鮮有不敗蓋以無正其道之心而有謀其

利之意也吾能知天人相感之理故教人以求安之道言不言在余用不用在君而至于窮阨之境則當思吾言耳禹治雖非吾徒人見識超邁故有是能言云

○內侍鄭弘淵余曾祖左相公八寸弟也宣祖朝始到京師未屬內府之前時時踵門及其隸籍來拜以辭曰國有定制內外截然此生更無拜謁之日寧不悲哉遂涕泣而去及余儀賓王室弘淵年老尚在見余垂涕曰公與外朝有異而吾嘗受戒於先左相公故絕意於往來門下云弘淵歿于今上丙辰年

八十八為人恭謹善良故

孝廟令侍東宮

○金謹行倭譯也秩高家富而持身謙恭且多計慮故交隣之際朝家倚而任之謹行有女婿新造家舍頗宏潔一宰官為避寓而借之金婿強許而愠見於色辭宰官怒其不恭文訴刑曹請治以凌侮士夫之罪時余堂叔左相公為刑部長謹行曉詣其第請曰賤婿得罪宰官願痛杖之雖見血亦不恐也堂叔試謂曰其罪奚至於此乎謹行曰小人有富名婿不被重杖則將上累於老爺且薄罰之則不足以解宰官之怒後將重被大罪矣叩頭乞不已謹行可謂能於

涉世者也

○仁祖戊子年間武臣金某為平安兵使時有所昵妓愛之專房而妓嘗留情於武倅鄭好信不能忘鄭因公事到營則妓偷隙潛出好合綢繆而有密告兵使者兵使詰問之妓牢諱之至舉刀斫指以誓之見者莫不愍歎好信聞而忿之曰此妖物也吾不可隱請謁兵使悉陳事狀以重罪人皆多之好信官至副揔管享年七十沒于今 上朝

○洪彥純譯官也嘗赴燕持厚貨往妓館館人指一室以示曰此可以稱此直也彥純入視則乃國色小

父而服素眼淚有悽惶不忍色彥純細叩之乃被罪
兵部尚書之女而欲運父樞賣身取資自言一許此
身當終身守節彥純聞之拜於庭下曰外國賤譯何
敢污天朝宰相之家耶即以其金遺之而歸同儕者
並嗤嘲之彥純不少悔後三年隨使節復往濟瀋自
禮部連問彥純來否人皆異之到京始知前日宰相
之女為禮部尚書繼室尚書問彥純意氣傾慕問訊
云時使行蓋為本國改宗系事而事由禮部尚書以
彥純故極力左右之遂得盡洗千古誣讟之辱 宣
廟大喜告于 廟社錄光國勲封彥純為唐陵君而

尚書夫人召見彥純厚餉錦繡以報之云領相洪公
命夏聞於其時長老言于余如是

○朴弘者光海朝相臣也癸亥改玉後以屢出賊招
賜死其妾李每言伊時事輒曰士大夫當官處身當
決以已意毋為傍人所撓惑雖子弟妻妾之言一切
不可從當趙浚疏諫母后不可廢被鞠受刑也家翁
掌鞠事叅坐及罷歸脫帽投地曰目見此事何忍不
歸斷有退去之志而子弟並皆沮止吾亦以歸田後
資生之難非徒不能贊決反有挽留之語畢竟禍機
至此士夫之居官處身豈可為傍人所撓乎其所謂

決以已意云者實是藥石語也事在光海乙卯六月云
○有末裔宗室家在果川窮不能自存嘗於所居不
遠地因墓掘地得誌石乃高麗王子之墳也歲久平
夷故初不得認而其壙中從葬奴婢牛馬犬羊之類
並以黃金鑄之於是掩其坎而取金以歸仍得富厚
稱一日為退亡婢至全州乘夜便旋於田中忽為流
矢所中而死人疑亡奴之為而或為祟於墓中金寶
矣前別提李幼弼居在同鄉目覩傳說而事在崇禎
丙子難前云李以堪輿術効勞於山陵時者也
○朴姓武人為葬其母穿壙乃高麗名宰之墓也有

誌石石色如玉刻字填真紅朴碎之投江去骸骨而
葬其穴逮庚申獄受戮雖死非當律人謂陰報云

○余自幼少時逢老人輒問古事有關西妓真伊年
垂八十曾為李爾瞻子大燁所蓄者也嘗謂余曰爾
瞻主文衡掌試士則士子不當踵門而或袖所製請
其品題或稱論難古文踵相接不絕而奴顏婢膝媚
悅百狀其慕勢趨附如此則立朝所為從可知矣爾
瞻豢養無恥之徒以充朝著天豈不降罰哉且言渠
反正後赴人家宴會見士大夫攘臂噴沫罪狀爾瞻
者多曩日冒夜出入於爾瞻家者也爾瞻勞心迎士

自以為必得其力而反致敗家亡國至於身後詆辱
又出於平日結為死黨者之口自是以後若見假名
儒士粉飾言貌出入人家者則未常不為其家憂之
云

○有舊時政府錄事出入金自點家者言於余曰

孝廟在春宮時掖庭人有舊恩於自點家者來言

闕中之人竊謂相公於春宮有不臣底意相公能以
此時釋權避勢則或可有一分之救不然則其危可
立待矣自點家聞此言而其長子鍊外無一驚懼者
至辛卯鞠獄 孝廟下教曰自點之不欲臣事於余

余知之已久至是始知掖庭人所聞之不虛云

○余於今上乙卯年間往浴溫泉秣馬村家家主
孫泰雄年過八十矣自言曾為沈器遠陪吏余問汝
於器遠未敗前能知其必敗乎泰雄曰小人無遠識
安能有先見耶但見世所謂武士者無人于謁宰相
之門以求發身而不過旅進旅退而已器遠則不然
來則因接致款辭意綢繆故武士之留連門館夜以
繼日者其類甚多無不誇勇獻奇以自眩售門庭之
雜亂如此其能無禍乎其包藏逆謀雖非人人之所
可知而其時識者多知其不終矣余見甲寅以後宰

臣被禍者多崇於武士盈門則泰確之言可以警世矣

○余於年少時偶逢金自點舊奴於鄉村問其家禍敗之崇則曰吾主偏愛小子欲其貴無所不至迎接名士大夫使其分朋角黨而已為其魁身為黨魁者其有保全者乎吾主之敗崇於接名士好權勢云

○叅奉宋德基常言天啓乙丑年間有數十儒士為做科業往山寺讀書炙牛肉以啗一士人以一串橫拭佛口曰勸汝一串肉其夜其人夢壓而死云夢壓之事或出於偶然而以程子未嘗背佛而坐觀之則

慢辱殊非雅士所為可以為戒云

○有一武人事其師甚至師亦子蓄之而師有妾善裁縫及師死妾無依賴賣針指以資生矣武人家適與其妾所寓相近每製衣服必於是妾手請製且以米豆周其急妾深感之時時來謝因以相昵遂有身既不可隱則與之同居焉其後或值國有逆獄邏捕四出則妾輒憂其連逮曰君必與知武人怒責之妾曰君既無難於淫其師之妾則必有犯上之心是以憂之耳武人赧赧不能言妾之疑悔終其身不已云

○人以非理悅人而責報者終末有不遭反傷者某

宰掌試私其所昵者數人取其文置高等登第皆至榮顯自謂數人者必感已之恩死且不避矣後數人者與人評論某宰曰推度其科場行私雖弑父與君亦可為也適有獲習於某宰者聞其言而告之某宰愧赧忿恨不能作氣僅成語音曰某也安敢乃已某也安敢乃已又有一掖庭別監語後進同伴曰士夫之欲夤緣宦官宮妾圖事者必先交吾輩然後輿路可通故一朝士以厚利誘我事成之後恐其洩漏反欲害之以滅跡我不得不報復之以避害彼此初無不正之事則豈有末梢之變哉汝輩以吾為戒慎勿輕

交士夫之無恥者云有年老譯官親見兩事言於人
○長老謂余曰金自黥以白徒叅靖社勲身都將相
富貴隆赫而猶不自足欲令其子鉞占巍科據清顯
以厚貨賂鄉儒之善文者代述擢茅至於登玉署冒
銓卽門闌一時熱甚而又欲以其孫世龍圖尚翁主
誘贗卜者偽贊其命欺罔至尊連姻王家氣勢所壓
無物不摧 孝廟在震卽亦恐其見忤而迷不知悟
終至身被大戮家無噍類冤厥禍源皆由於為子求
榮為孫圖婚云翁主 仁祖後宮出初封孝明翁主
余家門外有盲人金自鳴者卜術不足取而家貲

近巨萬出錢利息能傾南北商賈余常恠之後聞其
詳則富譯李馨長名入於孝廟辛卯獄事而方赴
燕未還故朝家秘不宣而其家人密知之恐其財沒
官潛移自鳴家後馨長伏法諸子緣坐死妻女亦流
配無人推還自鳴因得以專其利富厚幾四十年馨
長之弊心力營為者一朝盡為他人有而旨之一子
浪遊娼樓日費其金盲亦憂其破業余以理喻之盲
亦笑

○金自點勢焰方張時家有咀咒之變致疑一婢而
不能明其虛實密招軍官一人使奸其婢而探知之

軍官正色曰使我監杖訊問則固無所辭既為夫婦之後又探其隱而發告以殺之則非人情不可為也自點踈其人改使他人奸之乃於寢席間誘說得實以告遂殺之而因此得顯後自點之敗與其禍

○今 上辛未秋有四五宰臣為其老母設壽筵于掌苑署舉朝公卿莫不與焉只一二人托疾不赴筵臣至請賜樂以侈之歌管鍾鼓轟暢遠通而其地與閔國舅第僅隔數百步時 中宮閔氏殿下方遜于其第有書吏金貞立者大言于眾中曰余於昔日與刑曹吏憲府吏携妓張樂於一酒家樂未半憲吏一

人忽愀然不樂曰余有繼母為父所黜而不知其所
往矣今聞住在此家近地雖未敢違越父命經自入
見而在此與宴心有所不忍即辭去彼雖無知下賤
而秉彛同得之天不可誣也今日宰相之張樂在於
廢宮傍近而無一人避去者其識見反在憲府吏下
乎南人士夫不可以士夫待之聞者掩其口而責以
老妄貞立忿忿不勝發聲愈高後余以享官赴齋所
以貞立之言語差祭宰其宰低頭曰吾雖不叅其筵
而聞此言愧忤不自勝云

○庚申搜局後許及第積宗室禎等四五家皆籍沒

家產至已巳遣官致祭按籍還給甲戌後又按已巳
還給之籍一一還徵金貞立大言於衆中曰朝家既
已還給則典賣資生乃其勢耳當從方今見在之物
沒八而六年之後按籍還徵有若索出賊贓者然失
信大矣所得其能補其所損乎西人士夫中何無一
人識事理者至欲陳疏構草求覓疏紙不得已止貞
立心有所激則不能忍耐多類此人以愚者目之後
貞立棄吏役歸南陽以丙子正月十九日死年七十

三

○仁祖改紀後貽書國舅韓西平浚謙問宮闈間所

當先者公對曰光海時恩賞過濫以致失國今宜一反其事使宗戚貴近皆知分限至於賜與之物亦皆定式無開僥倖之路然後可無恩竭致慢之弊而國家亦得久安矣 仁祖大以為然凡所施與務得其中此皆由韓公一言助云 孝廟常以此語憐平大君青平沈都尉侍傍聞之為余言如是

○綾昌君佺 仁祖之弟也幼有令名為光海主所忌未娶而死於獄只有孽女一人 仁祖念之猶已出嫁歸名族而視其子女猶外祖簪屨之微無不軫念以賜

○癸亥靖社時推戴以定而勲臣中有專尚權術者故仁祖恐其臨時反覆親赴師期于延曙驛由彰義門而入議者謂其人必不得令終後果然云今上二十一年乙亥立碑于仁祖駐家之地上親製文以記之

○仁祖壬午日本國請得御筆揭於其日光山願堂上使義昌君珖代書日光淨畧彰孝道場八字以送之蓋不欲以宸翰播之外國也而人多不知認為宸翰誤矣

○仁祖己巳四月御經筵講洪範至惟辟玉食經筵

事臣張維進曰舉世皆以王食為稻米臣則以為不然也凡饌需之珍美者必以玉饌綺食稱之王食亦此意也天生五穀為民食豈使人君獨食稻米乎知經筵事臣金尚容曰此亦不通之說也天生金玉豈但使人君獨用之乎然定為品制故下民不敢服用上問領議政吳允謙曰此言何如對曰臣亦自少以玉食為白飯今聞張維之言甚有理也

仁祖為昭顯世子擇嬪也有一處子容貌豐盈一見可知其為有德之人而但其坐立無儀哂笑不節賜之飲食則無論飯羹湯馐皆以手指取啖宮女指

以為狂 上亦疑其為風病不之察也後有所歸甚有婦德 仁祖聞而咄嗟曰我墮其術中矣余嘗聞此說於老宮人告諸先友柳丈景紹則柳丈曰我亦曾聞此言而其處子姓權云

○崇禎丙子前詔使有以中國玩好送于我朝者中有春戲子者以象牙雕刻作男女淫戲狀其巧無比 仁祖命政院自外撞碎之時有年少假注書數人及其未碎取見於公座長老聞而咄歎曰詔使之送注書之觀皆亡國兆云

○仁祖改玉之初諸勲臣意欲盡革舊事雖其不可

廢者事在光海朝者則必欲改易乃已金相國尚容
進于 上曰人之勤于梳頭者日或千梳或百梳而
猶未能盡祛膩垢夫日以千梳之勤不得盡祛一頭
之垢則何能以一人之力一朝而盡易一國之事乎
為國之道視其泰甚而更張之可也不察事之是非
一以革舊為心則民不勝其擾也 上嘉納之

○仁祖丙戌年間命賜姜氏死即昭顯世子配也朝
臣驟諫之至于以去就爭者 上怒曰欲去者去予
不禁也時 孝宗在儲位乘間進曰 殿下失言矣
人主必羅致恬退清直之士置之朝著之上採用其

言然後國家可保如或怒其忤觸任其退去則在朝者無非患失苟合之鄙夫如是而國不亡者未之有也 上曰予果失言老璫侍聽者言於余

○柳夢寅在光海朝為吏曹叅判及 仁祖改玉東西轉徙不恒其居戊辰逆獄之起辭連被逮初不知其所在或為已亡命旋得於西山西山乃楊州村名也拿鞠相臣問曰汝何為謀逆又何以亡命夢寅曰光海之必亡嬪孀皆知新主之聖德奴隸亦知我心豈有棄聖君復庸王之意哉且我非亡命但往來西山耳相臣曰爾之西山之說我亦鮮聽矣使武王立

箕子為天子則夷齊豈往西山耶夢寅良久默然曰
我作孀婦詞以見志以此為罪則死無所辭仍誦而
告之曰七十老孀婦端居守空壺傍人勸之嫁善男
顏如槿慣誦女史詩稍知姘姁訓白首作春容寧不
愧脂粉諸相臣欲活之有云云勲臣曰不殺夢寅則
效尤而不欲立朝者必多隄防不可不嚴竟論以逆
律夢寅自號於于堂有文集行于世

沈領相之源每語於人曰朴承宗既為光海朝首
相則反正後安得保全其命但承宗常有不是爾瞻
廢母之論且死得其所則籍沒家財非勸戒來世之

道也余與金叅判始振伴直摠府時修撰沈梓崔後
尚八直闕中來見金公言及此事金公之論亦與沈
公同

○人之處世不遵正道專任權術則終必有禍竒自
獻 宣祖兄河源君女婿也光海時以左議政立異
於廢母之論癸亥反正後亦叅卜相之列而常以權
數籠絡一世甲子逆适之變有告其與賊連謀者被
逮未覆而适兵卒逼都城金昇平塗盡斬在囚諸人
自獻亦與焉蓋疑其有權謀而與賊通謀人皆稱冤
故延平李公陳劄伸雪而禍之所從來蓋亦自取云

○癸亥四月初十日光海在江華園籬中也 仁祖

大王下教曰廢人罪惡雖重即 先王遺體也余念

在彼困苦不覺淚下今者時當授衣布紵優數下送

仁祖賓天趙相國翼撰謚冊文而有曰 慈聖克

享隆養人不間於宋皇昌邑得盡天年事有難於漢

帝實輿誦之言也光海後移濟州以辛巳七月初一

日棄世距其生萬曆乙亥四月二十六日壽六十七

訃聞 仁祖輟朝三日進素饌五日特遣禮曹叅議

蔡裕後率其郎僚與中使護喪以來又令各道監司

陪行檢飭祭奠禮曹請葬以王子君一等禮 仁祖

特命用隧長生殿梓官易棺改歛遣承旨致祭十月初四日葬于楊州赤城洞亥坐巳向之原與其配文城郡夫人柳氏同原異室距光海所生母恭嬪金氏墓一牛鳴地金氏在光海朝追尊為恭聖王后稱其墓曰成陵逮癸亥革其號禮官中使監司終始監護反魂于漢城長興坊私第使其女子奉祀賜田宅藏獲而三年內朝夕朔望正朝寒食端午仲秋及四仲朔祭奠之需出自宮家柳氏卒於江華園籬中乃癸亥十月初八日也距其萬曆丙子七月二十一日生壽四十八用其年閏十月二十九日先葬于此其

治喪營葬之禮皆有所定故光海之喪亦用其例光海之女即其時淑儀尹氏出而後歸士人朴徵遠尹氏乃士人嫡出云其女之將婚 仁祖助其需又命舊時宮人往見之余嘗聞先王長老及老璫老宮人之言得詳其時事後因事過赤城洞見光海君墓表所記叅以前聞錄之如是

○仁祖大王癸亥十二月十三日改玉二十一日使判尹李适奉廢主及廢世子送于江華五月二十一日廢世子闕地跳出為守者所捉自二月十二日專廢食飲二十四日廢世子嬪朴氏自縊死之距其生

戊戌十一月二十日年二十六二十六日以右相尹
昉啓辭收議於大臣三司及二品以上而兩司合啓
請斷之以義勉從廟堂之議 上答曰省啓不勝驚
恠斷之以義之議是何言耶桎之穿穴不堪其苦之
所致有何罪過想其情事豈不矜憐乎頃在廢朝骨
肉之變殆無虛歲此其美事乎予不料今日復見此
事也勿為如此之論保全性命毋違至意廿七日司
諫鄭蘊引避曰臣於廢東宮按法之啓未免隨叅矣
及見 聖批愚秉自敝不能堅執初見幾誤 聖德
之罪大矣請逋臣職太憲具允譴大諫朴東善引避

曰臣等深為過慮以處變之道率爾論啓矣昨承

聖批感激于中思欲將順

聖意以為萬世

聖德之

事而及見鄭縕之啓尤不覺瞿然知悔幾誤

聖德

與縕無異請適臣等之職執義趙希逸引避曰將順
之美臣何敢獨後於人乎玉堂陳劄并請出仕六月
二日大司憲李貴持平沈器遠金自點論啓并請兩
司之官初三日仍請速處十八日玉堂上劄請決從
兩司之請 上荅曰予不料此論出於爾等今觀劄
辭不勝驚恠勿為如此之論以安予心廿一日朝講
時三司合辭請啓 上曰不得已勉從廿三日以禁

府啓辭議于右相昉使之自盡領相李元翼原任大臣奇自獻及余曾祖府君病不獻議廿五日廢世子祔自縊死 仁祖下教曰衣衾棺槨依廢嬪例為之其葬在楊州水落山玉流洞東麓斷崗上云

○仁祖改王後議定曩日亂政者之罪有以追戮已死為請者 仁祖揮手止之曰光海戮尸之刑慘不忍言予不欲蹈其轍耳至 孝廟辛卯有趙貴人之獄時貴人之母已死有追刑之議先君翼憲公以仁祖下教之事陳達榻前事得寢未幾因臺臣論啓遂戮之趙氏 仁祖後宮也

○癸亥初吳相國允謙入侍經筵有一勲臣白于

仁祖曰 中朝靖國後以燕山宮人分賜功臣今可
倣而行之吳公進曰光海宮人多有進環者而今日
勲臣皆是向日北面之人自 上雖有分賜之命猶
當以死牢辭豈可自下先請乎數倫敗紀莫此為甚
上欣然曰卿言良是予不敢敬聽事遂不行先君
每誦伊時 聖教言於家庭

○仁祖丁卯清兵陷關西臺諫請正監司尹暄失守
之律 上不允者久臺啓請寢適貞惠翁主因事入
闕翁主乃暄之猶子新之之內 仁祖之姑也為乞

其命 上曰朝廷之事當付公論予何敢低仰姑氏
詣闕之後若貸暄死則人必以予為私翌日遂允臺
啓蓋翁主之言激之也 仁宣張大妃嘗語諸公主
以為戒

○仁祖大王天章甚高而未嘗作一句詩批旨文字
亦必使內侍謄書而即沈手草於水盃裂以去之故
親王子家所有亦不過七八字小字無所行宸翰矣
○鄭判書經世於 仁祖朝秩至正二品而特命仍
任玉堂長官進講經史啓沃弘多 仁祖久不能忘
後有逖臣請官先賢某某後者 上從之仍令吏曹

判書進前曰予之得免大過鄭經世之助實多經世子孫亦為收用先君八侍親聞 天語云

○丁丑南漢下城之日被擄男婦累萬雜在賊中見上號哭曰主上主上何忍使吾輩至此耶朝廷士大夫分黨交爭不恤國事以至於此而朝士之誤國者晏然若平昔徒令無辜百姓受此繫累之慘願 主上念之拯濟於水火之中也 仁祖俯聽流涕

○仁祖時人蔘價高貴不可得戚里一婦人有微恙其家子弟欲藉以網利陽稱病劇請得獨蓼湯生材仁祖令內局細剉以送之蓋下燭其詐使不可用

於買賣也戚里惶恐後不敢飾非也戚里亦有所懲畏云

○仁祖大王下教宮中曰漢文帝慎夫人衣不曳地天子後宮猶尚如此小國宮人何可使衣裾曳地乎故及予出宮禁之日遺風猶存焉

○有老宮人嘗言

仁祖朝鳳林

孝廟潛邸

獐平兩大

君出閣後每當入謁宮中

上輒使年少宮人避匿

曰天王家自有禮法大君雖於予為子而出閣之後則便同外人宜有內外之別不可如幼年在闕之時聖祖嚴宮闈之道如此云

○申平城景禎 仁獻王后之外從也登武科錄靖
社勲一等大拜至左議政及病重不可起始進領相
蓋 仁祖慮其非讀書人或不能鎮壓百僚以存重
惜名器愛人以德之意而又念其勲使於身後得以
人臣極職書諸銘旌也余於幼時侍長者之會聽其
所言則曰趙龍洲綱李潛窩命俊在 仁祖朝入侍
榻前極言 上過失曰 殿下於宮中某時有某事
某日作某物乎 上或游辭以待則再三更陳 仁
祖必 下教曰果然後始乃退伏兩人固是敢言者
而 仁祖崇獎直言使兩人能犯顏直諫若是而兩

人在他時為此舉則必不得免云

○靖社諸勲臣方議舉義以為必得宗室中有聖德者然後可以安宗社保民生而綾陽君龍行虎步有日月之表可為神人之主試問於錦陽尉朴瀕錦陽率爾妄對議不相合遂與之相絕舉事之日義兵將發具綾城寇進曰公子登極之後若念朴瀕之言則將示人不廣願忘之也 仁祖下教曰此是臣擇君之時吾豈介念乎願勿置慮也諸人聞此教已知終為聖明主而錦陽猶不自安若將朝夕得罪者 仁祖特除惠民署提調以安其心焉向非 仁祖如天

之量其何能保全性命乎錦陽

宣廟之儀賓也

○壬辰倭亂

宣祖去邠余曾祖左議政府君諱昌

衍扈駕至長湍東坡驛拜禮曹判書白于行朝曰賊

兵已迫朝夕未保宜埋

廟社主於爭處不幸國亡

猶免委擲之辱幸而重恢可以還奉以歸有數三人

以為如此則國必亡而

宗社先亡矣事竟未行後

四十五年有丙子胡亂王子大臣奉

宗社主入江

都時有欲獻埋安之議者而懲於當時峻斥之論不

敢發及江都陷沒一島魚肉

宗社主汚辱之慘有

不忍言者還都後幾盡改造至是人莫不追思余曾

祖之言其後谿谷張相國言於潛谷金相國曰閱歷
多者思慮深事必覩其末終然後可知古人經遠之
慮也今日宗社之遭此變實由於壬辰攻斥鄭相
之議也谿谷之胤張判書善徵時侍傍聞之後言於
余

光海戊午姜弘立以都元帥領兵赴潯河與天兵
合擊建州虜兵敗降虜仁祖丁卯乃引虜兵而來
以復舊君為辭蓋疑癸亥反正或失吊伐之義也及
至境上始知仁祖以聖德中興奉大妃復位而金
沙溪長生鄭愚伏經世張旅軒顯光皆彙登朝端驚

曰此人必不以非道立朝其意大沮勸虜兵去身歸
本國丁卯虜兵專為脅和和成便退未必不由於弘
立之勸令解兵而賢士之進退係國家重輕如此

○申昇貞淑翁主之子也其妻李氏嘗隨其姑入覲
大內出而語人曰孰謂南面王樂乎曉起讀書旋又
視膳問寢於東朝晝省奏御文字夕又讀書以至夜
深其訖訖自苦如此不及於窮措大無所營為安居
自便者遠矣此雖婦女信口真率之言而 仁祖孝
事東朝憂勤庶政之德可因此窺測矣

○孝廟朝後宮李氏慶州人也生淑寧翁主而終

孝廟世爵止淑媛供出該司此外無一毫所加 顯
廟在春宮請以內府剩餘助其不足屢白而終不許
曰留為他日恩可也蓋 上意欲令其畏威於當朝
而舍恩於後嗣其懲前慮後之意至矣及 顯廟嗣
服禮遇備至至于今 上恩禮極隆封至安嬪女官
極品也癸酉卒壽七十二哀榮無憾焉

○後宮於所生子女不敢呼爾汝蓋不敢自母於其
子之意而安嬪李氏於淑寧翁主爾汝之 孝廟將
加重罪 仁宣王后屢請得免焉

○孝廟誕五公主一翁主而每有恩賜不及翁主仁

宣后以為言 上曰何必均之手 后輒以私財與之蓋 上意欲以恩出於后而使翁主常有感戴嫡母之心也 上之微意后之至德無間然矣

○李孝達信達乃 寧陵後宮李氏之兄弟也 上嘗招之伏於掖庭使中人傳命曰汝輩若憑藉汝妹使閭巷有舉汝姓名者則將令兩司囚繫汝罪折汝膝骨而後已也孝達等恐懼屏息不敢向人作聲氣至今五十餘年渠輩年亦八十餘而安享清福視他宮族屬之驕橫覆滅者何如哉 聖朝約束嬪御之制固可為萬世法而孝達之保有家室莫非 聖恩

之攸暨也

○孝宗大王一日密問於先君翼憲公曰具綾川仁
厓方為訓局大將而老不堪事卿亦思其代乎勲戚
中誰可為者先君對曰為國之誠未必盡在勲戚聖
鑑所照如得其人則願勿以非勲戚而忽之也 上
曰是指李浣耶未幾綾川拜相適將李公為其代號
令嚴肅賞罰明慎而軍政解弛之餘卒見紀律修舉
多有怨之者或粘書闕外或掛榜城門謀所以去之
者百端 上又密問於先君曰以卿薦浣故先勲舊
戚里而用之今一軍皆怨將奈何先君對曰仁厓柔

善年且老只以地望坐鎮而已未嘗罪一吏杖一卒
故兵不畏將者已多年矣久安之餘猝見新將紀律
嚴明自相恐怯相與造謗以至流播内外若過五六
朔頭緒整頓則軍中必恨其來之晚願上少俟之
毋為流言所動浣久掌輦下之兵則國家終必賴之
國家不安在此臣敢以百口保之上曰予志堅
定卿勿慮焉李公終能為國盡誠不負所知大為
孝顯兩朝所倚重余嘗白先君曰大人之薦李公
自是廟堂重事而至其有謗而再詢之時則上心
已動矣大人猶不變初心益保其無他何以恃李公

若此之深耶先君曰吾於丙子之亂與李浣俱在陣中晝夜同處嘿察其倉卒間處心之際則終非負國家者是以知之深而薦之堅也豈無所以而為之者哉

○孝宗大王聖德出天友愛尤至其視同氣子孫無異已出余於稚年猶及與隣坪崇善樂善及益平青平寅平三都尉隣坪子福寧君四兄弟昭顯子慶安君出八九宮屢承孝廟提耳之訓孝廟命隣坪長孫之名曰福詳蓋於當今諸公主之生男也已以吉祥慶祥嘉祥隣祥錫命又將待諸家兒之生俾與

聯名欲其益加和協又欲使諸王孫儀賓衣袵鞍馬
必與相同無有厚薄妍媸故諸家婦女輒相通議一
時措辦 上亦助其需一儀賓偶未相告先着新衣
上大怒命裂其衣大責貴主常 下教曰汝輩以
王室宗賓處地相同務相愛護不失和氣以體予敦
睦之心也余心常感戴服膺銘骨諸公子志趣操行
雖或方圓不同余未嘗有物我之心彼雖以詐我則
以實彼雖害我我不介懷只以無負 聖訓為心及
至後日既有自絕于天未免大辟者且諸家子孫又
不能不失和氣各有色目分黨角立視若仇讎俯仰

人世歲月無幾而亦無知有當日懇惻之教者悲矣
○己亥春 孝廟以儒生事欲有教勅把筆擬草手
戰放之口號 聖旨使益平尉洪得箕書之 命世
子坐側提省得箕聽瑩處書既畢 上以為有可添
刪處藏之几案間時臣隨諸儀賓亦侍傍而年歲幼
稚只知為儒生事不解 聖教旨意後問洪益平則
益平曰 孝廟在潛邸聞長老之言知昏朝儒疏皆
出權奸之指揮常用慨然及登大位屢諭於引接臣
僚之時曰昏朝之將廢毋后也館學儒生舉皆陳疏
其叅疏者豈盡有廢毋之心乎儒生輩勤苦讀書以

期進取而身操黜陟之柄者怵以禍福賈使同叅苟
非大力量大見識孰能不畏目前之禍而不受駭迫
乎因仍局促終不自脫為世所棄者不可勝數此不
但儒生之誤着亦國家道率之未盡其方也欲為定
式頒布中外者久矣至伊日始起草而聖旨暨曰
館學及鄉儒將欲陳疏則必須先期通文于中外儒
生明言某日以某事拜疏同志者來叅不願者不使
施罰勒叅雖居泮居學者亦許各從其志欲叅則叅
不欲叅則不叅為善為惡皆自己求勿為迫脅等
教而未及筆削弓劍遽遺不得宣布云

○余於孝廟朝每見上引接臣僚之日則宦官皆有憂色相謂曰今日慈臣得無以吾輩罪過陳達乎及朝臣退出聞其無事然後始乃平心宮女亦然近習之畏朝臣非畏朝臣之言乃畏上之能虛受其言也

○孝廟朝有一老鐺金彥譙年迫九十神精銷亡特一未冷之尸而上嘗置內府不令歸家日給御膳人莫測聖意所在他日顯廟下教曰彥譙侍

昭顯在藩之日昭顯有過則泣諫之終日不食明日又諫之先王常見其如此故常加厚恤也



